



Fasnacht 2005

Sujet: TUT-CHUM-UND-MACH-MUMM

Vor Viertusigjoor het eine glebt
 wo letscht Joor Basel het belebt
 au in de ganze Regio
 ghörsch numeno vo dem Pharao
 mir findes au es bitz zum lache
 das ei Tote sune Wirbel cha mache
 und will er isch go Basel bsueche
 händ mir nit lang nacheme Sujet müesse sueche
 drum hemer Sujet do simmer nit dumm:
 TUT-CHUM –UND-MACH-MUMM

Die Usstellig isch zwar scho verbi
 und si isch fantastisch gsi
 das viele Gold ,de Schmuck, nome so Plunder
 alles fascht wie im Märli oder es Wunder
 all das isch eifach mega toll
 drum isch s`Museum jede Tag voll
 Lüt dien sich uf de Füess umestoh
 wänd vor de Vitrine nüm witer go
 s`got zue wie immene Bienehuus
 do chömme mir gar nüm drus

Au mir sind ins Museum gange
 stönd schön hinde a in dr Schlange
 nach gschlagene drei Stund
 wo d` Kasse immer nöcher chunnt
 händ grad welle d` Billett zahle
 ghöremer en Satz ganz en fatale
 „liebi Gäscht s`Museum isch voll,ohni übertriebe
 wer no in dr Schlange stoht muess duse blibe“

Ueber die Usstellig hät niemer chöne reklamiere
ganz Basel chann vo soneme Alass profitiere
leeri Hotelzimmer gits fascht keini me
will zuesätzlich 40'000 Uebernachtige hets ge
d`Bäcker düend es Brot kreiere
müend sicher vo Aegypte no Mehl importiere
au d`Fischerstube macht do mit
braucht es Bier s`isch dr Hit
drum sagemers jetzt und hier
es schmeckt das TUT –ANCH –Ueli Bier

Es gäb nur ei Usstellig in Europa hemer ghört
drum git`s do e Sach wo eus stört
mir findes drum en grosse Hohn
die zweiti Usstellig dört obe in Bonn
denn d` Schwobe sinn e nit bache
müend mit eusen TUTANCHAMUN
no Chohle mache

Jetzt wüset ihr an de Fasnacht hejoderno
warum het`s am Umzug siebe Pharao
müend vor dene aber nit verschrecke
düend jo keini Mumie drunter stecke
numme mir vo de Dorfplatzrueche
wo euch wänd erfreue oder düends versueche
drum ischs au nit unter jeder Larve stumm
mit em Sujet.TUT-CHUM-UND-MACH-MUMM